

Lex Fifa – excepziun per levs cas da corrupziun

Lescha pli severa per glied che sa lascha unscher

DA CLAUDIA CADRUVI / ANR

■ **Il cussegl naziunal propoia da persequitar levs cas da corrupziun mo sch'insatgi porta plant. Uschia chatta el in bun cumpromiss tar la varianta da la chombra pitschna.** La stad aveva lez-za tractà la Lex Fifa gist suenter che funcziunaris da l'organisaziun mundiala da ballape èn vegnids arrestads en ils Stadis Unids perquai ch'els han sa laschà unscher. L'entira truscha aveva fatg impresziun a la politica svizra e la chombra pitschna n'ha betg fatg lungas d'acceptar reglas pli severas cunter la corrupziun.

La chombra pitschna ha dentant integrà en la lescha anc il passus, sch'in cas da corrupziun na tangheschia nagins interess publics, vegnia el persequità da la procura mo sch'insatgi portia plant. Ier ha il cussegl naziunal chattà in cumpromiss tar quest passus problematic.

Interess public – betg criteri duvrabel

«Tenor tge criteris decidan ins tge che stat en l'interess public?» ha criticatg *Daniel Vischer* (verds/ZH). «Stat insatge en l'interess public mo sche las gasettas scrivan surlonder?»

Cusseglia federala *Simonetta Sommaruga* ha fatg attent ch'ins sappia savens pir en il decurs da las examinaziuns sch'in cas da corrupziun cuntrafetschia als interess publics. Perquai saja quest criteri betg duvrabel. Cun 100 cunter 83 vuschs ha il cussegl naziunal stritgà la cundiziun da l'interess public ord la lescha.

Sco soluziun da cumpromiss ha *Daniel Fässler* (pcd/AI) proponì ch'in lev cas da corrupziun duaia vegnir persequità mo sch'insatgi portia plant. Sco «levs» possian ins taxar cas nua ch'i va mo per paucs millis francs, nua che la sanadad da terzas personas n'è betg tangada e nua



Guido Tognioni, anteriur um da cader da la Fifa e criticher vehement da Sepp Blatter, ha persequità ier la debatta en il cussegl naziunal.

KEYSTONE

ch'i na sa tracta betg da malfatgs repetids u da bandas.

Adumbatten ha Sommaruga fatg attent che cas levs sajan gia uss excluds da la persequiziun. Il cussegl naziunal ha acceptà il cumpromiss da Fässler cun 133 cunter 58 vuschs.

Nagin post cunter corrupziun

Il problem cardinal da la corrupziun saja che nagin dals involvads veglia che la

chaussa vegnia enconuschenta. Ed anc sch'insatgi veglia annunziar in cas na sappia el savens betg nua sa volver, ha ditg *Lukas Reimann* (pps/SG). Perquai ha el pledà persuenter d'installar in biro cunter corrupziun nua ch'ins po tgisar cas.

Las partidas burgaisas han taxà in tal post sco nunnecessari e memia char. Sommaruga ha fatg attent che l'administraziun saja gia londervi da realisar in

post en connex cun las disposiziuns da whistleblowing. Il cussegl naziunal ha refusà il post cunter corrupziun cun 117 cunter 60 vuschs.

Lescha vertenta nunduvraba

Las reglas vertentas cunter corrupziun privata existan dapi il 2006. Ellas n'han mai manà ad ina condemnaziun. *Daniel Jositsch* (ps/ZH) ha discurrì da «disposiziuns nunduvrablas». Ellas stattan scrit-

tas en la lescha cunter concorrenza nun-faira (UWG). Tenor quellas disposiziuns èsi da mussar si ch'in cas da corrupziun ha dischavantaggià in concurrent. La nova legislaziun duai eliminar quest obstachel e procurar per reglas pratigablas.

La corrupziun activa e passiva da magistrats e mandataris uffizials enconuscha reglas pli severas che la corrupziun dal champ privata.